

*paruerit, testamentum ratum firmumque esse.* Et Tom. IV. Basilicor. pag. 280. dicit Theophilus in lib. 4. *Institutor. tit. 1. illustres esse Protospatharios, & qui supra eos sunt.* Cetera autem quæ citantur Theophili loca, ubi *ὁ μακροτέρως* dicitur, neque ad synchronum Iustiniani Theophilum referenda sunt, neque ad alterum, qui sub Constantino Porphyrogenito vixit, de quo postea erit sermo; sed ad Theophilum tertium, qui post Alexium Comnenum claruit, spectant, quemadmodum infra ostendam, postquam libros Basilicorum recensuero.

Nonnulla ab auctoribus solent Theophilo Antecessori vitio verti. Daniel Huetius lib. 2. de claris Interpretibus pag. 133. *Iustiniani Institutiones* (inquit) *Græce retulit Theophilus Antecessor, eleganti quidem & erudita, sed prolixissima Paraphrasi, in quo sapientissimi Imperatoris sapientissima sanctioni minime paruit, quæ (Præfat. 2. & 3. in Pandectas) Legum vetitis interpretationibus reliquis & interdictis, solam eam, quæ esset xetὰ νόδα probavit.* Antonius Augustinus lib. 3. emendationum cap. 8. Antiquitatis Romanæ peritiam majorem in eo desiderari probat. Viglius Zuichemus in Præfat. ad Carolum V. Imp. pag. 45. *Nullus autem unquam tam bonus fuit interpres, ut non aliquo in loco a scopo (quod dicitur) aberraret: & habent etiam optima vina suis faeces. Quapropter inveniet fortassis quædam, qui diligentius volet singula excutere, quæ reprehendi possint, veluti quod Draconem Lacedæmonium legislatorem fuisse tradit, quod Macedonem non feneratorum, ut nos accepimus, sed filiumfamilias: quod pro Tiberio Pium nominavit: ac ejus generis alia, non ita tamen (ut existimo) multa.* Ego vero non eam in me provinciam suscepi, ut universam Theophili Græcam Paraphrasim ad trutinam revocarem, aut illum ab omni doctorum virorum censura purgarem. Id tantummodo æquos lectores rogo, ut typis editos Institutionum Græcos libros cum manuscriptis omnibus conferre non graventur: quod ubi fecerint, eventurum fore existimo, ut si non omnia, saltem pleraque, quæ Theophilo tribuuntur, sphalmata evanescant. Exemplo sit,